

Mañan ta e "Anochi di Pedro 'Chencho' Kelly"

For di principio di Juni mi a sigui preparacionnan di Pedro "Chencho" Kelly pa e anochi di **"40 añ den musica cu Chencho Kelly"**, cual show lo tuma lugar **mañan anochi 8 or den Cas di Cultura**. El a lucha pa por a haya un grupo di musico hunto pa forma un orquesta pa e anochi di hubileo. Ora el a logra tur locual e mester den instrumentonan musical pa su show, pa medio di e musiconan, el a drenta den e periodo di dolor di cabez.

Esaki tabata pa logra areglo pa cada un di e cancionnan cu ta wordo presenta den e show aki. El a bishita un tras di otro pero a logra. Su dolor di cabez grandi lo ta con pa paga e musiconan y esnan cu a taha riba e are-

glonan. Riba esaki a bini mas dolor financiero cu tabata tecnico di sonido cu lo uni cu esnan di Cas di Cultura pa duna lo mihor den sonido.

Mencionando Cas di Cultura so caba, por conta cu riba tur e gastonan ta bini mas o menos 2 mil florin di sala, y riba esey e placa necesario cu mester pa haci promocionnan. UNOCA a cay aden y a yude cu un contribucion pa cubri cierto parti di su gastonan. Mi no a menciona M.C. ni snacknan pa musiconan den intermedio etc. ni di ensayonan.

Manera simannan tabata pasando **"mi a mira cabez di Chencho crece cu gastonan pa cubri"**. El a logra ademas di atrae e musico profesional **Albi Navas** cu algun aña pasa a bay biba y traha na Corsow, pa bin atende ensayonan y

forma parti di e orquesta.

Mi a keda cu dedenan cruz pasobra fanaticonan musical no sa di e dolor cu tin tras di preparacion di un concierto di calidad y nivel halto y na hopi ocasion nos a laga nos propio profesionalnan un banda pa bay conciertonan di artistanan cu no ta yega na pia di nos musiconan. ora el a bisami cu e a cobra 20 florin so, mi a puntre ta con e ta cubri tur su gastonan cu 400 hende den sala y no e poco mas di 500 cu e sala ta tuma. **"Esey ta keda den man di Dios"**, el a laga sa. **"Mi kier djis trece un concierto fantastico pa e publico y spera di cubri mi gastonan. E no ta pa haci ganashi"**. Loke por sobra di entrada ta bay como suma inicial pa un scol di percusion cu e ta bay lanta. Ariba tereno di percusion, **"Chencho"** ta e grandi di nos isla actualmente.

CARERA ARTISTICO DI 40 AÑA DI CHENCHO

Mi por bay atras pa 40 aña pasa cu **Chencho** a drenta den bida musical cu su rumannan **Vicente y Franklin** tocando Bongo y campana, sigui pa timbal, drums y tambora.

Di e bandanan musical, e prome di cual el a forma parti tabata **Los Juveniles** cu a bira e number un di Aruba pa varios aña y a toca den diferente pais den exterior.

Di **Los Juveniles** el a pasa pa **La Nueva Fuerza** cu den su tempo tambe tabata nr. 1 di nos isla y cu tambe a cosecha masha exito den exterior. Na mes momento e tabata integrante tambe di **Vicente Kelly y Los Pimentosos**. Vicente aki tabata tin un acordeon cu estilo unico cu un seccion di ritmo cu timbal, conga y drums.

Cu su 18 aña di edad, **Chencho** a cuminsa tuma les di piano na scol di musica di **Adayma** y su maestro di piano tabata e maestro tremendo **Roberto Montiel d.f.m.**

E tempo ey e tabata toca ainda cu **Los juveniles** cu 3 aña sigui a logra titulo di **Rey di Tumba cu Robert Jean D'Or**. Tabata 1976, 1977 y 1978. Tabata na 1983 cu Vicente a forma **La Nueva Fuerza** cu a ricibi diferente reconocimiento musical y internacionalmente a representa Aruba hunto cu **Fruko y sus Tesos y Joe Aroyo**.

Un di e exitonan clasico di **La Nueva Fuerza** ta **"Mi Banana"** cu a domina den Caribe y **La Nueva Fuerza** a bira tambe e atraccion grandi di **Carnaval di Cartagena**

y a habri porta asina tambe pa otro agrupacionnan di Aruba.

Chencho a keda motiva pa sigui tuma cursonan y a tuma curso di solfeo, harmonia y areglo ampliando su conocimiento musical.

La Nueva Fuerza na 1988 a haci un gira tambe na **Republica Dominicana** y toca hunto cu **Aramis Camillo y den Studio 54** y na Colombia a bolbe pa representa cultura di nos isla den un festival.

Chencho na Aruba e mes aña a forma parti di **"Aruba All Star Band"** como timbalero den tempo di **Aruba Jazz and Latin Festival** den stadion **Don Elias Mansur** y dos aña despues cu e banda aki a representa Aruba den **Festival di tumba ABC den Curacao Festival Center**.

Cu **La Nueva Fuerza** el a toca na **Venezuela, Colombia, Miami (Merca), Hulanda, Berlin (Alemania), Belgica, Luxemburgo, Corsou y Bonaire** y cu **Vicente Kelly y los Pimentosos** el a toca na **Valledupar, Colombia** den e **XXVIII Festival de la Leyenda Vallenata** na 1994.

El a forma parti tambe di **T.I.G.O** y cu e banda aki a biaha pa **Cuba y St. Maarten** pa presentacionnan cultural y e tabata forma parti tambe di e agrupacion di **Coro ARS Nova** bao direccion di **Mayra Kock-Garrido** como corista tenor y a representa Aruba na **La Havana** den festival di coro na **Universidad de la Havana, Centro de Estudio Mariano y Instituto Superior De Arte na Havana**.

Cu masha hopi artista di nos isla **Chencho** a haci grabacionnan pa LP y pa CD's como percusionista. El a sigui **curso di percusionista na La Havana, Cuba** na 1997 y 1998 y ricibi **certificado di Percusion intensivo na Instituto Superior**



de Arte y na 2006 a gradua pa su **Bachelor of Arts na Rotterdams conservatorium (Codarts)** y despues a sigui den **"musicologia na Universiteit Utrecht na Hulanda**. El a participa aki den diferente agrupacion musical, manera e.o. **Gerald y La Ritmica, Caribbean Sun, The Cuban Experience, Latin Jazz Band y Herencia Cultural**. Su carchinan pa mañan anochi ta obtenibel na Cas di Cultura y na porta tambe anochi, na Valero San Nicolas, Plaza na Dakota y botica Sta. Anna, Noord y botica Santa Cruz di loke mi a corda pero pa cualquier informacion tuma contcto cu **Chencho** mes na 592421. Mi tin aki 5 foto di **Chencho** y ta cualnan y cuanto mi por usa pa yena e espacio aki mi no sa. Mi ta laga esey den man di e diagramador y ta spera di mira un Cas di Cultura completamente yen mañan. Sostene esnan cu ta di nos. muestra bo aprecio na **Chencho** sinta den sala di concierto mañan anochi.

Juby Naar

